


大明令



大明會典卷之九十六

禮部五十四

喪禮一

喪葬之禮通乎上下各有差等無敢僭踰。

歷朝大喪首

遺詔次部議而儀注事例附焉。

宗藩及品官卹典嘉靖隆慶以來數更條例今著其見行者以便遵守

大喪禮

洪武三十一年

高皇帝喪禮

遺詔。一天下臣民。令到。出三日。皆釋服。嫁娶飲酒。皆無禁。○一。毋發民哭臨。宮殿中。當臨者。皆以旦晡。各十五舉哀。禮畢。非旦晡臨。毋得擅哭。○一。當給喪事。及哭臨者。皆毋跣。絰帶。毋過三寸。無布車兵器。○一。諸王。各于本國哭臨。不必赴京。中外管軍戍守官員。毋得擅離信地。許遣人至京。○一。王國所在。文武衙門。官民軍士。今後一聽朝廷節制。護衛官軍。王自處分。○一。諸王不在令中者。皆以此令比類從事。

部議。一。在京五府六部等衙門官員。聞喪次日。各易素服。烏紗帽。黑角帶。赴

內府聽宣

遺詔。畢于本衙門齋宿。素服。朝晡詣

几筵哭。仍各置孝服。至第四日。成服。朝晡哭臨。至葬畢而止。仍自成服日為始。服孝服二十七日而除。其命婦。亦于第四日。各具孝服。由

西華門入哭臨。不許帶金銀首飾。○一

諸王。世子。郡王。王妃。郡王妃。郡主。內使。宮人等。俱服斬衰三年。自聞喪第四日。成服為始。二十七

月而除。凡臨朝視事。素服烏紗帽黑角帶。退朝服衰服。○一官員麻布大袖圓領衫。不緝邊。麻布帽。就用所帶帽。以布裏之。仍垂帶。麻腰絁。麻鞋。○一命婦麻布大袖圓領長衫。麻布蓋頭。○一冥器。行移工部及

內府司設監等衙門成造。照依生存所用鹵簿器物名件。○一作神主。用栗木為之。制度依家禮。○一差行人齋捧。

遺詔前去各布政司。并直隸府州衙門開讀。○一在外大小衙門文武官員人等。

詔書到日。素服烏紗帽黑角帶。行四拜禮。跪聽宣訖。舉哀。再行四拜禮畢。各置孝服。至第四日成服為始。每旦率合屬官僚人等。于本衙門朝闕設香案。哭臨三日而除。○一在外大小衙門。各令官一員赴京致祭。所用香燭祭物。禮部備辦。永樂二十二年。

文皇帝喪禮

遺詔喪服禮儀。一遵洪武舊制。

部議。一宮中自

皇太子以下。成服日為始。服斬衰二十七月而除。

親王。世子。郡王。及王妃。世子妃。郡王妃。公主。郡主。以下。聞喪。皆哭。盡哀。行五拜三叩頭禮。第四日。成服。斬衰。二十七月而除。凡

王視事。素服。烏紗帽。黑角帶。退服。衰服。服內並停音樂。嫁娶。其祭祀。止。停百日。○一在京文武官。初聞喪。素服。烏紗帽。黑角帶。明日清晨。詣

思善門外哭。五拜三叩頭。退。各置斬衰服。于本衙門宿歇。不飲酒食肉。第四日。成服。具衰服。詣

思善門外。朝夕哭。臨三日。又朝臨十日。洪熙後朝臨七日各十五舉聲。成服日為始。服衰服。二十七日。凡

入朝。及衙門視事。用布裹紗帽。垂帶。素服。腰經。麻鞋。退服。衰服。二十七日之外。素服。烏紗帽。黑角帶。二十七月而除。聽選辦事等官。服衰服。監生。吏典。僧道人等。素服。以成服日為始。皆赴順天府朝

闕設香案。朝夕哭。臨三日。又朝臨十日。洪熙後朝臨七日

各十五舉聲。仍各素服。二十七日而除。文武官命婦。聞喪。第四日。各服麻布大袖圓領長衫。麻布蓋頭。清晨由

西華門入哭。臨三日。仍各去金銀首飾。素服。二十

七日。凡音樂祭祀。官員軍民人等並停百日。男女婚嫁。官員停百日。軍民人等停一月。軍民素服。婦人素服不粧飾。俱二十七日。○一在外俱以聞喪日為始。令到之日。文武官員素服烏紗帽黑角帶。行四拜禮。跪聽宣讀訖。舉哀。再行四拜禮。畢。各置斬衰服于本衙門宿歇。不飲酒食肉。第四日成服。每旦率合屬官僚人等服衰服。就本衙門朝。

闕設香案。朝夕哭臨三日。又朝臨十日。洪熙以後並無朝臨各十五舉聲。成服日為始。衰服二十七日。衙門

視事。用布裹紗帽垂帶。素服腰經麻鞋。退服衰服。二十七日後。素服烏紗帽黑角帶。二十七月而除。文武官命婦聞喪。素服舉哀三日。各十五舉聲。去金銀首飾。素服二十七日而除。軍民男女。皆素服一十三日。凡音樂祭祀。官員軍民人等。並停百日。男女嫁娶。官員停百日。軍民停一月。○一在京文武官孝服。每員官給麻布一疋。自製。四夷使臣。工部造與孝服。

諸王公主遣官。及内外文武官員人等。詣凡筵祭祀者。光祿寺備祭物。翰林院撰祭文。引赴

思善門外行禮。各處進香官辭歸者。

諸王公主所遣。臨期司禮監請

旨給賜。其方面官與路費鈔二十錠。餘十錠。○一京

城間喪日為始。寺觀各聲鐘三萬杵。禁屠宰四

十九日。○一上

尊謚儀具。○一二十七日以後。

皇帝素冠麻衣麻經臨朝。退仍衰服。○一發引儀具

○一大祥奉安

神主神座儀物于

太廟前一日遣官祭告

太廟。至日。

上祭告

几筵殿。

皇太后

皇后以下各祭一壇。

王府遣官共祭一壇。在京文武官員共祭一壇。○

一禫祭遣

親王詣陵行禮

洪熙元年

昭皇帝喪禮

遺詔。山陵制度務從儉約。喪制用日易月。皆以二十七
日釋服。毋禁嫁娶音樂。在外親王。藩屏為重。不可輒離本國。各處總兵鎮守備禦重臣。及文武大小官員。亦毋擅離職守。聞喪之日。止于本處朝夕哭臨三日。悉免赴

闕行禮

部議。自聞喪日為始。不鳴鐘鼓。在京禁屠宰十三日。

諸王世子郡王及王妃郡主以下。並遵遺詔。喪服二十七日而除。上

尊謚次日。百官各具素服烏紗帽黑角帶。于

承天門。俟開讀

尊謚詔

嘉靖四十五年

肅皇帝喪禮

遺詔。喪禮依舊制。以日易月。宗室親郡王。各處總督鎮巡三司官。各於本處朝夕哭臨三日。進香。差官代行。衛所府州縣并土官。並免進香。

郊社等禮。及祔葬祔享。各稽

祖宗舊典。斟酌改正

部議。一發喪。

殿下括髮詣

大行皇帝宮內舉哀。哀止。小殮。括髮設奠。不用舉哀。

歸喪次。

皇貴妃等妃。

殿下妃。

皇孫。

涇簡王妃等妃。

景恭王妃。

寧安公主舉哀禮同。哀畢各歸喪次。○是日頒

遺詔。○一大殮。

殿下素服束髮詣

大行皇帝前舉哀設奠。不用大殮奉安

梓宮設

几筵安

神帛立

銘旌哭盡哀。

皇貴妃。

殿下妃。

皇孫及各

王妃。

公主哭臨禮皆同。○一成服。

殿下服哀服。詣

梓宮前舉哀。行奠祭禮。

皇貴妃。

殿下妃。

皇孫及各

王妃。

公主皆成服。各設祭一壇。六尚及宮人各隨祭禮。畢各歸喪次。○是日。內官內使祭一壇。以上祭俱用文

○次日。公侯駙馬伯五府六部等衙門。共一壇。文武三品以上命婦。共一壇。○一每七及百日。

殿下壇。

皇貴妃等妃共一壇。

殿下妃一壇。

皇孫一壇。

涇簡王妃等妃共一壇。

景恭王妃一壇。

寧安公主一壇。○一內外官員軍民人等及各

王府夷使禮並與洪武永樂同。

永樂二十二年上

尊謚儀

隆慶初稍有更定者附註于下

前期三日齋戒前一日遣官祭告

天地

宗廟

社稷如常儀

俱太常寺先期奏請各祭吉用祝文香帛果酒脯醢

是日今用前一日

內侍官置冊寶輿于

奉天門

即皇極門仍有香亭又几筵前左右先設冊寶案

捧冊寶各置輿

中

皇帝具衰服詣奉天門

隆慶初先祭告祭畢祭品如常儀

几筵陳設御皇極

門百官暫免朝參

內侍官舉冊寶輿導引官導

皇帝後隨降階陞輅

導引官退

百官序立金水橋南北向

皆素冠服腰經

俟冊寶輿將至皆跪冊寶輿過畢興皆

隨至

思善門外序立北向

皇帝降輅

隆慶初內官導引至乾清門外降輅

冊寶輿由中門入至

几筵殿丹陛上導引官導

皇帝由左門入內贊唱執事官各司其事導引官導

皇帝就丹陛上拜位捧冊寶官捧冊寶由左門入

隆慶

初由殿中門入至

几筵前分左右立。北向。導引官奏四拜。今內贊奏

皇太孫

親王皇孫陪拜丹陛上。百官陪拜

思善門外。內贊及鴻臚寺官同時傳贊四拜畢。導

引官導

皇帝由殿左門入。詣

几筵前。奏跪。內贊及鴻臚寺官傳贊

皇太孫以下。及百官跪。奏進冊。捧冊官跪進冊于

皇帝左。

皇帝受冊。獻畢。授捧冊官置于案。奏進寶。捧寶官跪

進如前儀。奏宣冊。宣冊官跪宣冊于

皇帝左。畢。奏宣寶如宣冊。畢。奏俯伏興。平身四拜。傳贊

百官同奏復位。導引官導

皇帝由殿左門出。就拜位。奏四拜。傳贊同禮畢。行祭禮。

導引官導

皇帝詣

几筵前。就拜位。奏四拜。隆慶初。接行祭禮。省就位。四拜奏初獻禮。奏

跪獻酒。隆慶初。初獻有獻。帛贊讀祝。讀祝官讀畢。亞獻終

獻禮拜傳贊並同。隆慶初。終獻後。有奏俯伏興。平身。奏復位。導引出殿左門

就拜位。奏四拜導引官導

皇帝由殿左門入。詣

神位前。捧冊寶授內侍官捧入。導引官導

皇帝入內奉安訖。奏叩頭畢。導引官導

皇帝由左門出。至丹陛上。奏禮畢。傳贊同導引官導

皇帝還宮

隆慶元年進呈

尊謚議文儀

先是

勅諭文武羣臣議上

尊謚。至期前一日。鴻臚寺官于

宣治門設

謚議文案。是日早。

上具袞服。隆慶六年。上具素翼善冠麻布袍腰絰

御宣治門。捧

謚議官立于階之東。文武百官各具素冠服。隆慶六年。百官

烏紗帽黑角帶皂靴詣丹墀。贊行四拜禮。興禮部官出前

跪奏進

尊謚議文。奏畢復位。序班二員引班首官稍進前。捧

謚議官以文授班首官。班首官受

謚議文。由中道進。將至

御前序班贊進

尊謚議文。

上起至

謚議文案之北。班首官進

謚議文置於案。贊跪。百官皆跪。

上覽畢。召翰林院官趨至前跪。

上以

謚議文授翰林院官。

命撰

謚冊文。翰林院官受訖。捧從中道出。

上復坐。贊俯伏興。班首官與百官俯伏興。班首官復
位。贊行四拜禮畢。序班徹案。

上還

隆慶元年

尊謚頒詔儀

先期鴻臚寺設

詔案于

皇極殿內東。錦衣衛設傘蓋于

皇極殿前。至日早。百官各具素服。烏紗帽。黑角帶。
于

承天門外伺候。

上御中極殿。具黑翼善冠。白素袍。黑犀帶。執事官先

行五拜三叩頭禮。鴻臚寺官奏請

陞殿。導駕官導

上御皇極殿。鳴鞭訖。序班舉

詔案于殿中。翰林院官捧

詔立于左。鳴贊唱頌

詔。翰林院官以

詔授禮部官。禮部官受

詔置于案。序班舉案由殿左門出。錦衣衛用傘蓋

迎至

承天門上。百官入班。鳴贊唱四拜。稱有

制。唱跪。開讀訖。再唱。行四拜禮。鴻臚寺官傳奏禮

畢。百官退。

詔書迎至禮部。授使者頒行天下

永樂二十二年發引儀

發引前三日。行奏告禮。百官預齋戒三日。隆慶初太

常寺先六日。奏齋戒。京城內外禁屠宰。音樂。初太

入皇堂。遣官以葬期告

天地

宗廟

社稷 祭品行禮如常儀

皇帝衰服告

几筵 禮如啓奠

皇太子

親王以下皆衰服隨班行禮是日後百官衰服朝

一臨至發引日止京師內外禁樂至祔祭日止

禁屠宰至葬畢日止發引前一日遣官祭金水

橋

午門端門承天門大明門德勝門并橋清河橋沙

河京都應祀神祇并經過去處應祀神祠隆慶初增

祭門 乾清宮門 隆宗門 思善門 并橋 歸

極門 御橋 玉河橋 沙河安濟橋 朝宗橋 其應

祀神祇 關王廟 天將廟 靈濟宮 皇城隍廟 東嶽廟

真武廟 內門橋 俱內官行禮 玉河橋 以下俱太

常寺官行禮 祭用酒 是夕設辭奠 隆慶初改辭

果散饌香燭祝文 是夕設辭奠 靈禮如初啓奠

皇帝

后妃

皇太子

親王以下皆衰服以序致祭司禮監禮部錦衣衛

官提督執事者設

大昇輿于

午門外。依圖式陳葬儀于

午門外。并

大明門外。發引日。設啓奠。內侍陳設醴饌拜位。如常儀。內導引官導。

皇帝衰服詣拜位。

皇太子

親王以下。各就拜位。贊禮贊四拜。奠帛。獻酒。讀祝。

四拜。舉哀。興哀止。望瘞。禮畢。隆慶初。改望瘞為焚幣帛。祝文。以後

祖奠遣奠至禮陵安神俱同內導引官導

皇帝詣

几筵殿內稍東。西向立。

皇太子

親王以下

丹陛上稍東。西向立。執事者陞徹帷幙等物。拂拭梓宮畢。內侍徹啓奠。內執事官進龍輅于

几筵殿下。設真亭

神帛輿

謚冊寶輿于

丹陛上。設祖奠如啓奠儀畢。內導引官導

皇帝詣

梓宮前稍東西向立。導

皇太子由殿左門入。立于

皇帝之南稍東西向。

親王以下俱于

丹陛上稍東西向立。內侍于

梓宮前跪奏請

靈駕進發。內侍捧

謚冊寶次捧

神帛由殿中門出。各置輿內。次捧

銘旌由中門出。執事官陞捧

梓宮。內執事持翼左右蔽

梓宮降殿。內侍官于

梓宮前跪奏請

梓宮陞龍輜。執事官奉登龍輜。訖以綵帷飾

梓宮。執翼仍列左右。內侍擊繖扇侍衛如儀。列舊所

御儀仗于前。

謚冊寶輿

神帛輿

真亭。

銘旌。以次而行。內導引官導

皇帝由殿左門出。

后妃

皇太子

親王及宮眷後隨。

后妃宮眷至哭於幃中

午門內設遣奠如祖奠儀。內侍于

梓宮前跪奏請

靈駕進發。司禮監官率儀衛

謚冊寶輿等前行。

皇帝

后妃

皇太子

親王以下皆哭盡哀。內侍于

皇帝前跪奏請還宮。內侍導引

皇帝還宮。

后妃以下俱還宮。

隆慶初子同還

皇執事官昇

梓宮由中門出至

午門外。禮官跪奏請

梓宮陞大昇輿。執事官奉

梓宮陞輿訖。

隆慶初即午門內內侍官跪奏請宮陞大昇輿安置訖始行遣奠禮

梓

禮官跪奏請

靈駕進發。司禮監禮部錦衣衛整視葬儀。以次前行。

皇太子

親王以下哭送

天順八年。弘治十八年。俱親王護喪行禮。隆慶初。遣駙馬都尉沿途至陵往返。俱遣官行禮。

靈駕出。至端門外。行辭

祖禮

後改為朝祖

執事官預設褥位于

太廟中香案前

太常寺設香燭

梓宮至端門外。禮官跪奏請辭

祖。導引官導

皇太子易常服。詣

神帛與前跪。禮官奉

神帛授

皇太子

皇太子捧

神帛由廟街左門入

隆慶初。梓宮至端門外。少駐導引官導。遣官易淺淡色服。詣

世宗

神帛與前跪。太常寺官跪于遣官之左。奏請

肅皇帝朝祖。太常寺官興。遣官俯伏興。詣與捧神帛。由廟街左門入。至

太廟褥位。跪置

神帛于褥與

皇太子正立于

神帛後贊禮贊跪。

皇太子跪。禮官跪于

皇太子之左。奏

太宗文皇帝謁辭。禮官興。贊禮贊俯伏興。

皇太子俯伏興。贊五拜三叩頭禮畢。

皇太子跪捧

神帛興。仍由廟左門出。至輿前。以

神帛授禮官。禮官跪受。

神帛安奉輿中。訖。隆慶初遣官自奉安訖。太常跪奏。請

請

靈駕進發。

皇太子仍喪服。遣官易及

親王以下隨行。

梓宮由承天門大明中門出。

皇太子

親王以下俱由左門出。步送至德勝門外。騎送至

陵。隆慶初遣官及各衙門分定送奠官俱步送至德勝門外。騎送至天壽山紅門外。仍步送至陵。

是日俱免辭。還仍朝見。在途并至陵。俱朝夕奠哭臨。

諸王皇親駙馬公侯伯及文武百官軍民耆老四

品以上命婦以序沿途設次致祭。皇親命婦及文武官三品

以上命婦共祭一壇于順天府前公侯伯及文武官員耆老人等共祭一壇于土城外禪師僧道共祭一壇于清河皇親及駙馬共祭一壇于沙河祭畢文武官不係山陵執事及分送者并命婦耆老悉還。

大昇輿行沿途每程預設校尉昇送選委內官同錦衣衛官專一提督務在起止有節行步安徐沿途宿頓之處預先搭蓋席殿仍量搭席房以貯儀仗等物至

陵執事官先陳龍輜于獻殿門外候大昇輿至禮官詣大昇輿前跪奏請

靈駕降輿陞龍輜詣獻殿執事官奉梓宮陞龍輜由中門入

皇太子親王俱由左門入遣官亦由左門入詣獻殿安奉訖

謚冊寶等輿仍陳于前行安神禮執事官陳醴饌如常儀設

皇太子拜位于梓宮前內侍導

皇太子詣拜位贊四拜興贊跪奠酒讀祝俯伏興贊四拜舉哀興哀止贊禮畢

親王以下陪拜如常儀。百官俱于鴻臚官傳贊同遣官祀后土并

天壽山。

各陳設酒饌。贊再拜興。酌酒讀祝。再拜興。禮畢。洪熙以後。俱同日別遣官祭。各陵。

儀同前。但前儀各四拜。但前俟掩

玄宮時至。設遷奠。執事官陳醴饌如常儀。設

皇太子拜位于

梓宮前。內侍導

皇太子詣拜位。贊四拜興。贊跪奠帛。奠酒。讀祝訖。

俯伏興。贊四拜。舉哀。興。哀止。望瘞。

親王以下陪拜如常儀。百官俱于鴻臚官傳贊同退。將掩

玄宮。內侍導

皇太子

親王以下。詣

梓宮前跪。內侍跪奏請

靈駕赴

玄宮。俯伏興。執事官陞奉遷

梓宮入皇堂安奉訖。內侍捧

謚冊寶置于前。陳列冥器等畢。行贈禮。內侍官仍設靈座于獻

殿上。候安神主。執事官陳醴饌于

皇堂門外。奉玉帛安置于香案前。設

皇太子拜位于前。内侍導

皇太子詣拜位。贊四拜興。贊跪。贊奠酒。贊進贈。執事官捧玉帛跪進于

皇太子之右。

皇太子受玉帛獻畢。以授内執事。捧入

皇堂安置訖。贊俯伏興。

皇太子俯伏興。贊四拜。舉哀興。哀止。贊贈事畢。内

侍出。遂掩

玄宮。掩畢。行享禮于

玄宮前。如遷奠儀。遣官祀

后土及祭

天壽山。後稱掩告謝

玄宮將畢。内侍設香案于

玄宮門外。陳醴饌如儀。設題

主案于香案前。西向。設

皇太子拜位于前。北向。内侍盥手出

主于案上。題主官盥手。西向。題

主畢。内侍奉

主置于神座。藏

神帛于箱中。置其後。内侍跪奏請

太宗文皇帝神靈上神主。隆慶初全具尊號奏訖贊四拜

興贊跪獻酒讀祝俯伏興贊四拜舉哀興哀止。

焚祝文內侍啓積受主訖跪奏請

神主降座陞輿奉

神主陞靈輿至獻殿上內侍跪奏請

神主降輿陞座奉

神主即座訖。隆慶初神主即座訖先行安神禮如前儀將回京別遣官以葬畢告各陵

行初虞禮執事官陳醴饌于

神主前設

皇太子拜位于香案前內侍引

皇太子就拜位贊四拜興贊行初獻禮贊跪。

皇太子跪奠帛奠酒讀祝畢俯伏興亞獻終獻贊

四拜舉哀興哀止望瘞禮畢內侍捧

神帛箱埋于殿前屏處潔地焚凶器于野葬日初虞

柔日再虞剛日三虞後間日一虞至九虞止在

途。

皇太子行禮還京。

皇帝親行禮。隆慶初自初虞至七虞在途八虞在城外俱護喪官行禮九虞還京上親行禮

神主啓行將還內侍于

神主前跪奏請

神主降座陞輿還京。奏訖俯伏興于靈座上奉

神主陞靈輿進行。儀仗侍衛如儀。

皇太子後隨在途仍朝夕奠。

神主還京先於城外置幄次。錦衣衛備儀衛。教坊司備鼓吹不作。百官衰服奉候城外。

神主至入幄次。百官序列于前。行五拜三叩頭禮畢。候

神主進行。百官後從至

午門外。儀衛等退。導引官導

皇帝衰服奉迎于午門內。

神主至。舉哀。步導

隆慶初。世廟妃。皇太子。王妃公主及宮眷等俱迎。于宮門內。舉哀。以次後隨。

神主陞几筵殿內。

皇帝立于殿上稍東。西向。內侍于

靈輿前跪奏請

神主降輿陞座。奏訖捧

神主安奉于靈座訖。隆慶初。親捧。行安神禮。執事官陳設

如常儀。內導引官導

皇帝詣拜位。奏四拜興。奏跪奠酒。讀祝。俯伏興。奏四拜。舉哀。興。哀止。焚祝文。奏禮畢。

皇太子

親王以下。陪拜如常儀。百官于

思善門外。隨班行禮。傳唱如儀。隆慶初安神畢。世廟妃皇太后

皇子以下。以次如拜位。舉哀。各行謁見。四拜禮。明日。百官行奉慰禮。隆慶

初無虞祭。內侍陳醴饌。拜位于

几筵前。如常祭儀。內導引官導

皇帝。衰服詣拜位。

皇太子

親王以下。衰服各就拜位。行四拜禮。初獻。奠帛。獻

酒。讀祝。亞獻。終獻。贊。四拜。舉哀。興。哀止。望瘞。禮

畢。卒哭。用虞祭。後剛日。禮同虞祭。自是罷朝夕

奠。至卒哭之明日。奉

神主。祔享于

太廟。儀具升祔下。祭畢。太常卿于

神主前。跪奏請

太宗文皇帝神主還

几筵。奏訖。導引官導

皇帝捧

神主由廟左門出至門外安奉于御輦儀衛繖扇導從如來儀。

皇帝陞輅後隨至。

午門外儀衛止。

皇帝至思善門降輅釋祭服易衰服隨御輦至。

几筵殿前內侍于輦前跪奏請

神主降輦陞座內侍奉

神主陞座訖內導引官導

皇帝由殿左門入行安神禮如前儀禮畢。

皇帝釋服還宮明日百官素服烏紗帽黑角帶行奉

慰禮

凡

大喪內朝賀祭祀等禮洪熙元年。

仁宗既祔廟。

上仍素服御西角門視朝遇行時享等禮太常寺奏

祭祀其日早朝鳴鐘鼓服黃袍。

御奉天門視朝祭畢仍如前至禫祭後始釋素服。

成化二十三年。

憲宗喪服既除。

上仍素翼善冠麻布袍腰絰視朝。不鳴鐘鼓。文武百官素服烏紗帽黑角帶皂靴朝參。至百日後始變服如常。是年冬至節。

詔免行賀。○弘治元年正旦。以

憲宗服制未及小祥。

上服黃袍御奉天殿。鳴鐘鼓。鳴鞭。作堂下樂。文武官具公服行五拜三叩頭禮。次日至十五日。具黑翼善冠淺淡袍服犀帶。

御奉天門。文武官具常服朝參。至禫祭免朝一日。遣官詣

陵致祭。○正德十六年。

肅皇帝萬壽聖節。以

武宗山陵未畢。令天下齋進表文。并公侯駙馬伯儀賓進賀綵段。俱免宣讀陳設。逕送司禮監承運庫交收。○嘉靖四十五年歲暮

大禘。隆慶元年孟春時享

太廟。以

世宗喪禮尚在二十七日之前。禮部題准照弘治十八年例。暫遣官行禮。樂設而不作。免

陞殿奏祭祀齋戒之日。

上于喪次致齋。陪祀官俱暫免。○隆慶元年正旦後。世宗喪禮成服畢。

上始服衰服。御宣治門視事。百官素冠服腰絰。行奉慰禮。以後朝參並同。至二十七日滿。

上易素翼善冠麻布袍腰絰。御宣治門視事。俱不鳴鐘鼓。百官素服烏紗帽黑角帶皂靴朝參辦事。二月祭

先師孔子及

朝日壇。

歷代帝王。以

梓宮在殯。議准照弘治十八年例免請

陞殿及傳

制。命太常寺具本奏知。仍各遣官行禮。樂設而不作。致齋之日。照天順八年例。

上具黃素袍翼善冠。百官具淺淡色服朝參。陪祀執事官。至期。仍各祭服行禮。本月祭

太社

太稷。議准仍請

上親祭。餘並同前例。三月。

世宗祔廟畢。次日免朝。百官烏紗帽黑角帶青圓領

辦事。又次日。

上具黑翼善冠黑犀帶淺淡袍服。御皇極門。百官仍
烏紗帽黑角帶淺淡色服。行奉慰禮。以後俱
皇極門視事。鳴鞭鳴鐘鼓。如

累朝例。是年孟夏時享

太廟。以

世宗神主尚在

几筵。照正德元年例。先一日。

上具常服祭告

几筵。祇請

詣廟享祀。以後遇

太廟時享。祫祭。大祥。內皆如之。其鴻臚寺奏請

陞殿。太常寺奏致齋。及祭畢

聖駕回宮。俱樂設而不作

大明會典卷之九十六

會典卷之九十六

